

Wachungaji Wasaidizi

Lichungeni kundi la Mungu lililo kwenu, na kulisimamia, si kwa kulazimishwa, bali kwa hiari kama Mungu atakavyo; si kwa kutaka fedha ya aibu, bali kwa moyo.—

1 Petro 5:2.

Mchungaji Mkuu anao wachungaji wasaidizi, ambao kwa hao anakabidhi utunzaji wa kondoo na wana-kondoo Wake. Kazi ya kwanza ambayo Kristo alimkabidhi Petro, alipomsimika katika uchungaji, ilikuwa ni kulisha wana-kondoo. Hii ilikuwa ni kazi ambayo Petro alikuwa ana uzoefu nayo mdogo sana. Ingehitaji utunzaji na upole mwingi, uvumilivu mwingi na ustahimilivu. Ilimpatia wito wa kuwahudumia watoto na vijana, na kwa wale wadogo katika imani, kuwafundisha wasiojua, na kuwafungulia Maandiko, na kuwafundisha kwa ajili ya kufaa kutumika katika huduma ya Yesu. Huko nyuma Petro hakuwa ameandaliwa kufanya kazi hii, wala hata kuelewa umuhimu wake.

Swali ambalo Kristo alimwuliza Petro lilikuwa la muhimu. Alitaja tu sharti moja la uanafunzi na huduma. “Je! Wanipenda?” Alisema. Hii ndiyo sifa ya muhimu. Japokuwa Petro anaweza kuwa alikuwa na nyingine zote, pasipo upendo wa Yesu asingeweza kuwa mchungaji mwaminifu kwa kondoo wa Bwana. Maarifa, ukarimu, ufasaha, shukrani na bidii zote ni msaada katika kazi njema; lakini bila upendo wa Yesu moyoni, kazi ya mchungaji Mkristo itadhihirisha kushindwa.

Fundisho ambalo Kristo alimfundisha kando ya Bahari ya Galilaya, Petro alilitumia maishani mwake mwote. Akiandika kwa kuongozwa na Roho Mtakatifu kwa makanisa, alisema:

“Nawasihi wazee walio kwenu, mimi niliye mzee, mwenzi wao, na shahidi wa mateso ya Kristo, na mshirika wa utukufu utakaofunuliwa baadaye; lichungeni kundi la Mungu lililo kwenu, na kulisimamia, si kwa kulazimishwa, bali kwa hiari kama Mungu atakavyo; si kwa kutaka fedha ya aibu, bali kwa moyo. Wala si kama wajifanyao mabwana juu ya mitaa yao, bali kwa kujifanya vielelezo kwa lile kundi. Na Mchungaji mkuu atakapodhihirishwa, mtaipokea taji ya utukufu, ile isiyokauka”

Kondoo aliyepotea mbali na zizi ni kiumbe asiyejiweza kabisa. Lazima atafutwe; kwa maana hawezi kuipata njia ya kurudi zizini. Ndivyo ilivyo nafsi iliyotanga mbali na Mungu; haijiwezi kama alivyo kondoo aliyepotea; na upendo wa Mungu usipokuja ili kuiokoa, haiwezi kamwe kuipata njia ya kurudi kwa Mungu. Hivyo mchungaji msaidizi anapaswa kuzitafuta nafsi zilizopotea kwa huruma, kwa huzuni na bila kuchoka! ... Hii ina maanisha kuvumilia usumbufu wa kimwili na Amani ya kujitoa mhanga. Inamaanisha kuomba kwa huruma kwa ajili ya wakosaji, huruma na uvumilivu wa Mungu. Inamaanisha sikio linaloweza kusikiliza kwa huruma masimulizi yenye kuvunja moyo ya uovu, udhalilishaji, kukata tamaa na maumivu.

Roho ya mchungaji wa kweli ni ile yenye kusahau maslahi binafsi. Anapoteza ubinafsi kabisa (*Gospel Workers*, 182-184).